

Inatsisartut suleriaasianni § 33 naapertorlugu matumuuna Naalakkersuisut aalajangiiffigisassatut siunnersuummik imaattumik saqqummiussaqrput:

Kalaallit Nunaanni eqqartuussisarnermik inatsisip allannguutaa pillugu inatsisip (Kalaallit Nunaanni najukkani eqqartuussiviit assigisaasalu allannguutaat) atuutilersinnissaanut Kalaallit Nunaanni Namminersorlutik Oqartussat oqaaseqaateqarnissaanik Inatsisartut aalajangiiffigisassaattut siunnersuut (Nunamut Namminermut, Pinngortitamut Avatangiisinullu Naalakkersuisoq)

Saqqummiussissut

(Nunamut Namminermut, Pinngortitamut Avatangiisinullu Naalakkersuisoq)

Siullermeerneqarnera

Kalaallit Nunaanni eqqartuussisarnermut inatsisip allanngortinneqarnissaanik siunnersuummik Naalakkersuisut Justitsministeriaqarfimmiit tigusaqrput.

Inatsisissatut siunnersuut Inatsisartunut agguanneqartoq innersuussutigissavara.

Kalaallit Nunaanni eqqartuussisarnermut inatsimmi atuuttumi § 2, imm. 1 aamma §747, imm. 1 siunnersuummik allanngortinniarnearput, taamaalilluni eqqartuussiveqarfiit massakut 18-usut amerlassusiat allanngortinniarnearluni eqqartuussiveqarfiit sisamanngorlugit. Taamatuttaaq ikaarsaariarnera sivitsorniarnearpoq, taamaalilluni eqqartuussisuusartut, eqqartuussisarnermik inatsisip atuutilernerani eqqartuussisutut atuuttut, utaqqiisaasumik atorfeqartinneqarnerat sivitsoqqinneqassalluni suli ukiuni pingasuni 2016-imi januaarip aallaqaataata tungaanut.

Kalaallit Nunaanni eqqartuussisarnermik inatsisip akuersissutigineqarneranut atasumik eqqartuussiveqarfiit pioreersut 18 pigiinnarnearput. Peqatigisaanik tamanut tunngatillugu eqqartuussisut piginnaanngorsarneqarnerat aallartinneqarpoq eqqartuussisunik ilinniartitsineq aallartinneqarluni eqqartuussisutullu atorfiit piffissaaq tamaat attuuffittut atorfinngortinneqarlutik aamma peqatigisaanik eqqartuussisut eqqartuussiveqarfinni arlalinni eqqartuussisuusinnaanerit periarfissinneqarpoq.

Aammattaq inatsisip atuutilernerani eqqartuussisunut immikkut ittumik akuersissuteqartarsinnaanermik atortuulersitsisoqarpoq, taamaalilluni eqqartuussisut, eqqartuussisut ilinniartitaanerannut peqataarusunnigitsut, 2013-imi jaunuarip aallaqaataata tungaanut eqqartuussisutut atuutsiinnarsinnaaqullugit.

Eqqartuussiviit, politiit aamma eqqartuussisut peqatigiiffianiit kissaatigineqarsimavoq eqqartuussiveqarfiit nunap immikkoortukkaarlugit eqitserneqarnissaat. Tamatumani siunertarineqarpoq suliit pitsaassusiisa qaffatsinneqarnissaat aamma tamanut atuuttumik eqqartuussisut ataasiakkaat sulineranni atugassaritat pitsaanerulersinneqarnissaat.

Peqatigisaanik eqqartuussisut ilinniagaqanngitsut eqqartuussisutut atuutsiinnarnissaanik immikkut ittumik akuersissuteqarnerup sivitsorneqarnissaa pisariaqartinneqarsimavoq, eqqartuussiveqarfinni sulisussarsiornerup annertuumik ajornartorsiutaanera pissutaalluni.

Siunnersuutip akuersissutigineqarneratigut eqqartuussiveqarfinnik sisamanik peqalissaaq, kommuneqarfiit killeqarfii malillugit. Peqatigisaanik sumiiffinni eqqartuussiveqqat pigiinnarneqassapput eqqartuussinermi pineqartut qanillugit eqqartuussisarnissat pisinnaaqqullugit.

Taamatut oqaaseqarlunga Naalakkersuisut sinnerlugit siunnersuut suliaasaq Inatsisartunut suliap akuersortumik suliarineqarnissaa suliaannngortippara, siunnersuutillu aappasaaneerneqarnissaa sioqqullugu Inatsisinut Ataatsimiititaliamit suliarineqarnissaa inassutigalugu.